

23/08/2001

Rangkaian berita pintar imbangi maklumat palsu

RANGKAIAN Berita Pintar Antarabangsa (SNNi) yang dilancar di Kampala, Uganda sempena Dialog Antarabangsa Selatan Afrika-Global 2001 (SAID-Global 2001) kelmarin membuka lambaran baru dalam dunia komunikasi khususnya mengimbangi berita tepat dengan berita yang direka-reka. Menerusi berita dan maklumat yang disalurkan menerusi SNNi ini, pembaca dan pengguna akhbar boleh membuat perbandingan antara berita yang diputar-belitkan menerusi agensi berita atau majalah dan akhbar asing yang dikuasai Barat dengan berita yang menonjolkan kebenaran di negara-negara membangun. Adalah tidak menjadi masalah jika agensi dan badan berita yang dikuasai Barat menyiarkan berita negatif di negara membangun, tetapi ia mestilah berlandaskan kepada fakta yang tepat. Sepatutnya mereka harus bertindak dengan etika tinggi, tetapi hakikatnya tidak demikian. Mereka seolah-olah mempunyai motif jahat dengan niat hendak mempersendakan kerajaan dan rakyat negara membangun.

Malaysia adalah antara negara yang sering menjadi sasaran pertubuhan berita asing kerana tidak senang dengan pemimpinnya. Mereka juga mungkin tidak boleh menerima kejayaan negara ini. Contoh terbaru dalam edisi terakhir majalah Time mengenai pelayaran Laksamana Zheng He pada kurun 1400. Tulisan panjang lebar mengenai pelayaran itu bukan saja tidak memberikan ruang yang wajar mengenai kunjungannya ke Melaka, tetapi sengaja menyelitkan dakwaan kononnya Perdana Menteri Datuk Seri Dr Mahathir Mohamad tidak mendapat sokongan rakyat berbilang kaum di sini dalam usahanya membentuk satu identiti Melayu di Malaysia.

Agak menghairankan bagaimana majalah itu boleh membuat tuduhan kononnya kerajaan berusaha membentuk satu identiti Melayu di Malaysia, padahal perkara ini tidak pernah berlaku. Walaupun dakwaan ini dinyatakan sekali imbas ia jelas menunjukkan usaha berterusan oleh majalah demikian untuk memburuk-burukkan imej negara dan pimpinannya. SNNi tidak akan wujud jika pertubuhan berita asing bersikap adil terhadap berita dan maklumat mengenai negara-negara membangun yang mereka salurkan ke seluruh dunia.

(END)